



BASES DA CONVOCATORIA DE AXUDAS A PERSOAS DEPORTISTAS, TÉCNICAS, ADESTRADORAS, XUÍCES E ÁRBITROS GALEGAS DE ALTO NIVEL

PRIMEIRA FASE: “AXUDAS GALICIA-PARÍS 2024”

**CÓDIGO DE PROCEDEMENTO ADMINISTRATIVO
DE400E**

ÍNDICE

1. INTRODUCCIÓN.....	3
2. OBXECTO.....	4
3. PERSOAS BENEFICIARIAS.....	4
4. FINANCIAMENTO ORZAMENTARIO.....	5
5. SOLICITUDES.....	6
6. INSTRUCCIÓN E TRAMITACIÓN DO PROCEDEMENTO.....	11
7. PAGAMENTO.....	16
8. OBRIGAS DAS PERSOAS BENEFICIARIAS.....	16
9. MODIFICACIÓN DA RESOLUCIÓN, REVOGACIÓN E REINTEGRO.....	17
RÉXIME XURÍDICO.....	18

1. INTRODUCCIÓN.

A Fundación Deporte Galego é unha fundación do sector público coa condición de medio propio e instrumental da Secretaría Xeral para o Deporte, asumindo como finalidade fundacional a promoción do deporte en Galicia e, de conformidade cos seus estatutos ten encomendada, entre outras funcións, o fomento do deporte de alta competición en Galicia mediante, entre outras fórmulas, a realización de patrocinios, outorgamento de becas e concesión de axudas.

A convocatoria destas axudas continúa coa axuda á preparación e participación das persoas DGAN (Deportistas Galegas de Alto Nivel) e persoas TAXAGAN (Técnicas, adestradoras, xuíces e árbitros Galegas de Alto Nivel), en competicións de modalidades/especialidades olímpicas e non olímpicas de ámbitos estatal, europeo e/ou mundial.

Do mesmo xeito que nas edicións olímpicas anteriores de Londres 2012, Río 2016 e Tokyo 2020, o desenvolvemento desta actuación estase a realizar durante o exercicio 2024 a través dunha convocatoria de axudas, con dúas fases consecutivas:

- Unha **primeira fase**, a presente que nos ocupa, denominada **AXUDAS GALICIA-PARÍS 2024**, orientada a aquelas persoas deportistas, técnicas principais e auxiliares, adestradoras principais e auxiliares, xuíces ou árbitros, incluídas na listaxe definitiva de convocados/convocatoria oficial definitiva, para os XX00/XXPP de PARÍS 2024.
- Unha **segunda fase**, a continuación da presente, denominada **AXUDAS DGAN 2024**, a convocar ao remate dos Xogos Paralímpicos París 2024, orientada ao resto de persoas deportistas, técnicas, adestradoras, xuíces e árbitros galegas de alto nivel, con recoñecemento en vigor pola Secretaría Xeral para o Deporte como DGAN nos anos 2023 e 2024, que non foran beneficiarias de axuda nesta presente convocatoria e que reúnan os requisitos para ser beneficiarias, de acordo aos criterios establecidos que serán publicados nas correspondentes bases. A única excepción a esta condición serán a daquelas persoas que tiveran resolta unha axuda na convocatoria da 1ª fase e que grazas aos seus resultados deportivos acadados en 2023, poideran acadar unha axuda na convocatoria da 2ª

fase que mellorase o importe da primeira. Nese caso poderán solicitar tamén na convocatoria da 2ª fase e resolveráselle un importe que complete, xunto co importe da primeira axuda resolta, o importe total da maior das dúas.

Como novidades desta edición 2024, sinalar que nesta mesma convocatoria se resolverán as diferentes axudas a todas as persoas deportistas, técnicas principais e auxiliares, adestradoras principais e auxiliares, xuíces ou árbitros, que acrediten participar da listaxe de convocados/convocatoria oficial definitiva para os XX00/PP París 2024, en lugar de facelo en convocatorias separadas como na edición anterior. Tamén se amplían os casos nos que as persoas solicitantes poderán ser beneficiarias de dúas axudas.

A presente convocatoria non é substitutiva doutras convocatorias que poida publicar a Secretaría Xeral para o Deporte.

2. OBXECTO.

Esta convocatoria ten por obxecto establecer as bases reguladoras da concesión de axudas destinadas a apoiar ás persoas deportistas, técnicas, adestradoras, xuíces e árbitros galegas de Alto Nivel que acrediten os requisitos administrativos e deportivos que se desenvolven nas presentes bases.

Esta primeira fase da convocatoria de Axudas en 2024 ten por obxecto establecer as bases reguladoras da concesión das AXUDAS GALICIA-PARÍS 2024, dirixida a apoiar ás persoas deportistas, técnicas principais e auxiliares, adestradoras principais e auxiliares, xuíces ou árbitros, incluídas na listaxe de convocados/convocatoria oficial definitiva para os XX00/XXPP de París 2024 e que cumpran cos requisitos establecidos no apartado 6.2. *Tipos de axudas, criterios de valoración e regras comúns a todas elas*, destas bases.

Co fin de facilitar a identificación dos formularios de inicio na sede electrónica da Xunta de Galicia, habilitase un enlace na Guía de procedementos e servizos co código de procedemento DE400E.

3. PERSOAS BENEFICIARIAS.

Poderán ser persoas beneficiarias desta convocatoria as persoas solicitantes que cumpran os seguintes requisitos:

- Ter en vigor o recoñecemento pola Secretaría Xeral para o Deporte, como persoa deportista, técnica, adestradora, xuíz ou árbitro galega de Alto Nivel, nos anos 2023 ou 2024. Como únicas excepcións a este punto, naqueles casos nos que non se poida acreditar tal recoñecemento, as persoas solicitantes deberán acreditar residir actualmente en Galicia ou ter residido durante a súa etapa de formación deportiva e reunir un dos seguintes requisitos:
 - Ter nado en Galicia.
 - Ter unha vinculación familiar ata o segundo grao de cosanguineidade en Galicia.
- Ter licenza deportiva vixente nunha especialidade deportiva incluída no programa dos XX00/XXPP de París 2024, expedida por unha federación deportiva galega dende alomenos o 1 de xaneiro do 2023. No caso dos deportistas que, cumprindo co apartado anterior, non teñan licenza federativa galega por ter que estar adestrando e competindo fóra de Galicia, a acreditación deste requisito efectuarase mediante certificación doutra federación territorial, española ou internacional.
- Cumprir cos criterios establecidos no punto 6.2. destas bases, acreditando oficialmente que o seu nome estea incluído na listaxe definitiva de convocados/convocatoria oficial definitiva para os XX00/XXPP de París 2024, como persoas deportistas, técnicas principais e auxiliares, adestradoras principais e auxiliares, xuíces ou árbitros.
- Non estar cumprindo sanción disciplinaria ou administrativa en materia deportiva de carácter grave ou moi grave.

No caso de todos os tipos de **Axuda**, a persoa solicitante deberá cumprir cos criterios específicos estipulados no apartado 6.2. destas bases.

Non poderán obter a condición de persoa beneficiaria aquelas persoas solicitantes nas que concorra algunha das circunstancias previstas no artigo 10.2 da Lei 9/2007, do 13 de xuño, de subvencións de Galicia.

4. FINANCIAMENTO ORZAMENTARIO.

As axudas concedidas de conformidade coas presentes bases serán imputadas ao orzamento do ano 2024 da Fundación Deporte Galego con cargo á partida “1. Axudas Monetarias” por un importe de 250.000 euros.

Sen prexuízo do anterior, en virtude dun incremento dos fondos asignados a este fin, a Fundación, se o considera oportuno, poderá acordar a ampliación do importe máximo do crédito dispoñible para esta liña de axudas. En todo caso, dita ampliación quedará condicionada á declaración de dispoñibilidade do crédito necesario por parte da Fundación. A resolución de ampliación do crédito dispoñible publicárase nos mesmos medios que a convocatoria e, en ningún caso, conlevará a apertura dun novo prazo de presentación de solicitudes.

5. SOLICITUDES

5.1. Forma e lugar de presentación de solicitudes.

As persoas solicitantes interesadas presentarán a solicitude (**Anexo I**) preferentemente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>.

Para a presentación das solicitudes de forma electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

Opcionalmente, poderanse presentar presencialmente en calquera dos lugares e rexistros establecidos na normativa reguladora do procedemento administrativo común das administracións públicas.

Tamén poderán presentarse as solicitudes presencialmente no Rexistro da Fundación Deporte Galego (R/ Madrid, 2-4, 2º (Fontiñas) – 15781 Santiago de Compostela), cuxo horario de rexistro aos efectos de presentación das solicitudes referidas ás presentes bases será de 9:00 a 14:00 horas.

A presentación das proposicións por unha vía diferente ás sinaladas será causa de rexeitamento ou exclusión.

5.2. Documentación complementaria

As persoas interesadas deberán achegar coa solicitude a seguinte documentación:

- **Anexo II. Autorización de representación.** Unicamente nos casos nos que a persoa solicitante outorgue facultades de representación a outra persoa inicialmente allea á solicitude.
- **Documento acreditativo da patria potestade ou tutela** (copia do libro de familia ou calquera outro documento que o acredite). Unicamente no caso de persoas solicitantes menores de idade e xunto co anterior Anexo II. Autorización de representación.
- **Anexo III. Formulario de participación olímpica/paralímpica.**

A documentación complementaria presentarse preferiblemente por vía electrónica.

Opcionalmente, as persoas interesadas tamén poderán presentar a documentación complementaria presencialmente en calquera dos lugares e rexistros establecidos na normativa reguladora do procedemento administrativo común.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

Sempre que se realice a presentación de documentos separadamente da solicitude, deberase indicar o código de procedemento **DE400E** e o órgano responsable do procedemento (FUNDACIÓN DEPORTE GALEGO), o número de rexistro de entrada da solicitude e o número de expediente se se dispón del.

5.3. Comprobación de datos.

Para a tramitación deste procedemento consultarase automaticamente os datos incluídos nos seguintes documentos en poder da Administración actuante ou elaborados polas Administracións públicas, agás que a persoa interesada se opoña á súa consulta:

- DNI/NIE da persoa solicitante.
- DNI/NIE da persoa representante.
- Certificación de estar ao día do pagamento coa Seguridade Social.
- Certificado de estar ao día do pagamento de obrigas tributarias coa AEAT.
- Certificación de estar ao día no pagamento das débedas coa Administración pública da comunidade autónoma.

No caso de que as persoas interesadas se opoñan a esta consulta, deberán indicalo no cadro correspondente habilitado no formulario correspondente e achegar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

Excepcionalmente, no caso de que algunha circunstancia imposibilitase a obtención dos citados datos, poderase solicitar ás persoas interesadas a presentación dos documentos correspondentes.

5.4. Compatibilidade con outras axudas

Estas axudas serán compatibles con premios ou axudas económicas recibidas durante o ano 2024 procedentes de calquera outra administración, ou de entes públicos ou privados, galegos, estatais e/ou da Unión Europea ou de organismos internacionais -sen prexuízo da obriga de comunicar ao órgano concedente a súa obtención-, e incompatibles no caso de premios ou axudas económicas para deportistas concedidas por outras Comunidades Autónomas durante o ano 2024.

Será obrigatorio declarar as axudas solicitadas e/ou concedidas para o mesmo fin, segundo o propio **Anexo I** de solicitude.

5.5. Prazo de presentación de solicitudes

O prazo de presentación das solicitudes comezará a contar dende o seguinte día da publicación do anuncio destas bases no Diario Oficial de Galicia, permanecendo aberto ata o 30 de setembro de 2024.

5.6. Corrección de solicitudes

Unha vez revisada a documentación, publicarase a lista das solicitudes admitidas e daquelas que conteñan erros ou deficiencias na páxina web deporte.xunta.gal, dispoñendo a partires dese momento de **10 días hábiles** para que sexan corrixidas, con indicación de que, se así non o fixese, teráselle por desistido da súa petición, logo dunha resolución expresa por parte da Fundación na que así se declare a desistencia.

5.7. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos mediante os modelos normalizados dispoñibles.

A persoa interesada deberá manifestar expresamente a modalidade escollida para a notificación (electrónica ou en papel) no formulario.

No caso de optar pola notificación en papel practicarase a notificación segundo o establecido na normativa reguladora do procedemento administrativo común.

De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do sistema de notificacións electrónicas de Galicia, Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

As notificacións por medios electrónicos entenderanse practicadas no momento no que se produza o acceso ao seu contido, e entenderase rexeitada cando transcorresen dez días naturais desde a posta a disposición da notificación sen que se acceda ao seu contido.

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

5.8. Trámites administrativos posteriores á presentación de solicitudes.

A sede electrónica da Xunta de Galicia permite as persoas interesadas realizar trámites electrónicos, con posterioridade ao inicio do expediente, accedendo á Carpeta cidadá da persoa interesada. Opcionalmente, as persoas interesadas tamén poderán realizar os ditos trámites presencialmente en calquera dos lugares establecidos na normativa reguladora do procedemento administrativo común.

5.9. Transparencia e bo goberno

Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da Lei 1/2016, do 18 de xaneiro, á que se atopen vinculadas, previo requirimento, toda a información necesaria para o cumprimento por aquela das obrigas previstas no título I da citada lei.

6. INSTRUCIÓN E TRAMITACIÓN DO PROCEDEMENTO.

6.1. Órgano de instrución.

O Director-Xerente da Fundación Deporte Galego será o órgano instrutor do procedemento, responsable da tramitación do mesmo.

Serán funcións do órgano instrutor:

- Revisar a documentación a presentar polas persoas deportistas coa solicitude de axuda e publicar a corrección de solicitudes, se é o caso.
- Realizar de oficio cantas actuacións estime necesarias para a determinación, o coñecemento e a comprobación dos datos en virtude dos cales se debe formular a proposta de resolución.
- Elevar a proposta de resolución das axudas ao Presidente do Padroado da Fundación Deporte Galego, para a resolución definitiva.

O órgano instrutor poderá utilizar e solicitar canta documentación considere precisa para unha mellor valoración e comprobación do proxecto.

6.2. Tipos de axudas, criterios de valoración e regras comúns a todas elas.

Establécense os seguintes tipos de *Axudas Galicia-París 2024*:

TIPOS DE AXUDA GALICIA-PARÍS 2024	DIRIXIDAS A PERSOAS DEPORTISTAS, TÉCNICAS PRINCIPAIS e AUXILIARES, ADESTRADORAS PRINCIPAIS e AUXILIARES, XUICES e ÁRBITROS GALEGAS DE ALTO NIVEL, CUXO NOME APAREZA INCLUÍDO NA LISTAXE DEFINITIVA DE CONVOCADOS/CONVOCATORIA OFICIAL DEFINITIVA PARA OS XXOO/XXPP DE PARÍS 2024 E <u>ADEMÁIS</u>	IMPORTE MÁXIMO
AXUDA GALICIA-PARÍS 2024 1	Teñan participado coma deportistas representando ao equipo olímpico/paralímpico español en catro ou máis edicións anteriores xa celebradas dos XXOO/XXPP ou acadaran medalla nalgunha participación	12.000 €

TIPOS DE AXUDA GALICIA-PARÍS 2024	DIRIXIDAS A PERSOAS DEPORTISTAS, TÉCNICAS PRINCIPAIS e AUXILIARES, ADESTRADORAS PRINCIPAIS e AUXILIARES, XUICES e ÁRBITROS GALEGAS DE ALTO NIVEL, CUXO NOME APAREZA INCLUÍDO NA LISTAXE DEFINITIVA DE CONVOCADOS/CONVOCATORIA OFICIAL DEFINITIVA PARA OS XXOO/XXPP DE PARÍS 2024 E ADEMÁIS	IMPORTE MÁXIMO
	olímpica/paralímpica.	
AXUDA GALICIA-PARÍS 2024 2	Teñan participado coma deportistas representando ao equipo olímpico/paralímpico español en tres ou menos edicións xa celebradas dos XXOO/XXPP e non acadaran medalla.	9.000 €
AXUDA GALICIA-PARÍS 2024 3	Non teñan participado en edición anterior algunha dos XXOO/XXPP.	6.000 €
AXUDA GALICIA-PARÍS 2024 D.A	- Acrediten competir como deportistas de apoio ou guía de deportistas DGAN paralímpicos/as ou de deporte adaptado clasificados para os XXPP París 2024. - ou - Exerzan como deportistas de apoio ou guía de outros deportistas paralímpicos/as clasificados para os XXPP París 2024.	100% da axuda do deportista
AXUDA TA PRINCIPAL PARÍS 2024	Acrediten participar como persoas con funcións técnicas principais ou de adestradoras principais dalgunha persoa deportista ou equipo participante nos XXOO/PP París 2024.	3.000 €
AXUDA TA AUXILIAR PARÍS 2024	Acrediten participar como persoas con funcións técnicas auxiliares ou de adestradoras auxiliares dalgunha persoa deportista ou equipo participante nos XXOO/PP París 2024.	1.500 €
AXUDA XA PARÍS 2024	Acrediten participar como persoas con funcións de xuíz ou árbitro nalgunha proba olímpica/paralímpica do programa deportivo dos XXOO/PP París 2024.	3.000 €

As axudas axustarase ás seguintes regras:

- A suma total de axudas concedidas non poderá superar o orzamento máximo previsto no punto 4 destas bases.
- Como norma xeral, concederase unha única axuda por persoa solicitante, sendo esta a de maior importe de todas ás que puidera optar. As excepcións a esta regra serán os seguintes casos:

- Persoas deportistas, conxuntamente como deportistas de apoio/guía de outras persoas deportistas de alto nivel que practiquen modalidades/especialidades paralímpicas.
- Persoas deportistas, técnicas principais e auxiliares, adestradoras principais e auxiliares, xuíces ou árbitros, en dúas modalidades deportivas diferentes (non especialidades nin probas diferentes).

Nestes dous casos, percibirán as dúas axudas, sendo a de maior importe, polo 100% da súa contía máxima establecida e a de menor importe, do 50% do seu respectivo máximo establecido.

- A todas as axudas se lles aplicarán as retencións legalmente vixentes en base á normativa do Imposto da Renda das Persoas Físicas.

6.3. Procedemento de concesión

As axudas concederanse en réxime de concorrencia non competitiva. En consecuencia, non será necesaria a comparación e prelación das solicitudes presentadas, atendéndose unicamente ao cumprimento efectivo dos requisitos esixidos para obter a condición de beneficiaria e á subsistencia de crédito na data de presentación da solicitude.

Unha vez rematado o prazo de solicitudes e comprobadas as que cumpren con todos os requisitos administrativos detallados nestas bases, o Órgano Instrutor enviará os anexos III cumplimentados e presentados polas persoas solicitantes, ás respectivas federacións deportivas galegas nas que declaren ter rexistrada a súa licenza deportiva, para que verifiquen e certifiquen o seu contido, de cara á súa valoración definitiva final dende a Fundación Deporte Galego.

6.4. Resolución de adxudicación

Presentada a solicitude, o órgano instrutor procederá a comprobar que se reúnen as condicións esixidas para obter a condición de beneficiaria das liñas de axudas. De ser o caso, o órgano instrutor elevará a proposta de resolución ao Presidente do Padroado da Fundación Deporte Galego, para que este resolva por delegación.

A resolución de concesión finalizará en calquera caso, o 31 de decembro de 2024. O vencemento do citado prazo sen que se notifique a resolución expresa, lexítima ao interesado para entender desestimada a súa solicitude.

As listaxes das axudas concedidas publicaranse na páxina web **deporte.xunta.gal**.

6.5. Aceptación da resolución

Publicadas as correspondentes resolucións, as persoas beneficiarias disporán dun prazo de **10 días hábiles** para a súa aceptación ou para presentar a súa renuncia, transcorrido o cal sen que se producise manifestación expresa, entenderase tacitamente aceptada.

No caso de que as axudas outorgadas non sexan aceptadas polas persoas beneficiarias ou que posteriormente á súa concesión se renuncie a elas, así como nos supostos do seu reintegro, non se alterará a distribución inicial do crédito entre todas as solicitudes, aínda que se aplicase a regra do prorrateo.

6.6. Reclamacións

Contra as resolucións da concesión de axudas poderán interporse reclamacións perante o órgano de adxudicación, no prazo máximo de **10 días hábiles** a contar desde a publicación das listas de persoas beneficiarias das axudas na páxina web deporte.xunta.gal, e na sede electrónica da Xunta de Galicia, <https://sede.xunta.gal>, con carácter previo á vía xudicial. O prazo para resolver as reclamacións será de dous meses.

Naqueles casos nos que algunha persoa solicitante e con axuda resolta se vise afectada colateralmente por algunha outra reclamación allea, teráselle comunicado tal circunstancia, tendo todas as partes afectadas dereito a 10 días hábiles máis para facer as alegacións que consideren oportunas.

7. PAGAMENTO

Unha vez que o Padroado da Fundación efectúe a resolución, procederase ao pagamento da axuda ás persoas beneficiarias por transferencia bancaria.

Para o pagamento da axuda concedida, as persoas beneficiarias das axudas deberán ter acreditado ou deberá terse consultado, tal e como se detalla no punto 5.3. das bases, estar ao corrente das obrigas coa Axencia Estatal da Administración Tributaria, a Seguridade Social e a Xunta de Galicia (Consellería de Facenda). Non será necesario comprobalo ou acreditalo de novo se a comprobación realizada ou os certificados presentados coa solicitude están todavía en vigor no momento de proceder ao pagamento.

8. OBRIGAS DAS PERSOAS BENEFICIARIAS

As persoas beneficiarias deberán cumprir coas obrigas previstas na Lei 9/2007, do 13 de xuño, de subvencións de Galicia. En particular, durante o presente exercicio e o seguinte:

- Aceptar e cumprir todas as estipulacións establecidas nas bases desta convocatoria.
- Comunicar calquera eventualidade significativa no proxecto deportivo.
- Someterse ás actuacións de comprobación que, no seu caso, puidera efectuar a Fundación Deporte Galego, así como calquera outra actuación, sexa de comprobación e control financeiro, que poidan realizar os órganos de control competentes, tanto galegos como estatais ou comunitarios, para o que se achegará

canta información lle sexa requirida no exercicio das actuacións correspondentes.

- Comunicarlle á Fundación Deporte Galego a obtención doutras axudas para o mesmo fin.
- Acreditar con anterioridade a que se dite a proposta de resolución de concesión que se encontra ao corrente no cumprimento das súas obrigas tributarias e fronte á Seguridade Social e que non ten pendente de pagamento ningunha outra débeda coa Xunta de Galicia, na forma que se determina no punto 5.3. destas bases.
- Participar nas actividades de difusión coa fin de demostrar o grao de aproveitamento destas axudas, así como nas actividades de promoción do deporte que poida programar a Secretaría Xeral para o Deporte, a Fundación Deporte Galego e/ou os seus patrocinadores e/ou entes colaboradores.
- Proceder ao reintegro dos fondos percibidos nos supostos establecidos no apartado 9 destas bases.

9. MODIFICACIÓN DA RESOLUCIÓN, REVOGACIÓN E REINTEGRO.

9.1. Modificación da resolución

Toda alteración das condicións tidas en conta para a concesión das axudas poderá dar lugar á modificación da resolución de concesión e, eventualmente, á súa revogación.

9.2. Revogación e reintegro.

A Fundación poderá proceder, tras o apercibimento previo ás persoas beneficiarias, á revogación e/ou esixencia do reintegro da axuda, así como dos xuros de demora correspondente, nos supostos de:

- Obtención da axuda falseando as condicións requiridas para iso ou ocultando aquelas que o impedisén.

- Incumprimento das obrigas como persoa beneficiaria establecidas nestas bases.
- Resistencia, escusa, obstrución ou negativa ás actuacións de comprobación e control financeiro mencionadas no apartado 8 destas bases que se puideran acometer, no seu caso, así como o incumprimento das obrigas contables, rexistrais ou de conservación de documentos.
- Calquera incumprimento das normas fixadas polas autoridades en materia de loita anti-dopaxe, en materia de loita contra a violencia no deporte e en materia de protección integral contra a violencia de xénero.

RÉXIME XURÍDICO

As presentes bases rexeranse polo dereito privado, séndolle aplicable o artigo 120 da Lei 16/2010, de 17 de decembro, de organización e funcionamento da Administración xeral e do Sector Público de Galicia, os principios de xestión contidos no artigo 5.2. da Lei 9/2007, do 13 de xuño, de subvencións de Galicia e os de información aos que fai referencia o artigo 16 do mesmo texto legal, así como os artigos do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, que desenvolven ditos principios de xestión e publicidade.